



საქართველოს გარემოსა და ბუნებრივი რესურსების დაცვის
სამინისტრო
**MINISTRY OF ENVIRONMENT AND NATURAL RESOURCES PROTECTION OF
GEORGIA**



KA060116156929516

საქართველო, 0114 თბილისი, გ.გულუას ქ. N6; ტელ:2727200, 2727220, ფაქსი:2727237; www.moe.gov.ge
6 G. Gulua Str. 0114, Tbilisi, Georgia, Tel:(+995 32) 2727200, 2727220, Fax:2727237; www.moe.gov.ge

6494

10 / აგვისტო / 2016 წ.

„მწვანე ალტერნატივა“-ს - აღმასრულებელ
დირექტორს ქალბატონ ნინო გუჯარაიძეს

ქალბატონო ნინო,

საქართველოს გარემოსა და ბუნებრივი რესურსების დაცვის სამინისტროში მიმდინარე წლის 29 ივლისს შემოსული #18147 წერილის პასუხად გაცნობებთ გარემოსდაცვითი ზედამხედველობის დეპარტამენტის მიერ მოწოდებულ ინფორმაციას. კერძოდ:

გარემოსდაცვითი ზედამხედველობის დეპარტამენტის დასავლეთ - ცენტრალური სამმართველოს (ყოფილი სამსახურის) უფლებამოსილმა პირებმა გადაამოწმეს საქართველოს გარემოს დაცვის სამინისტროს ეკოლოგიური ექსპერტიზისა და ინსპექტირების დეპარტამენტის 2013 წლის 6 მარტის ადმინისტრაციული მიწერილობით დადგენილ ვადებში შპს „ჯორჯიან მანგანუმი“-ს მიერ სანებართვო პირობების შესრულების მდგომარეობა.

ინსპექტირების შედეგად გამოვლინდა მიწერილობით დაკისრებული ვალდებულებების შეუსრულებლობის ფაქტი, რაზეც 2014 წლის 7 თებერვალს შედგა ადმინისტრაციული სამართალდარღვევის შესახებ No002561 ოქმი, ადმინისტრაციულ სამართალდარღვევათა კოდექსის 79 და 36 მუხლებით გათვალისწინებული დარღვევების გამო.

2014 წლის 28 თებერვალს ჭიათურის მაგისტრატმა სასამართლომ განიხილა ადმინისტრაციული სამართალდარღვევის შესახებ No002561 ოქმი და გამოიტანა No4/28-13 დადგენილება, რომლის შესაბამისად შპს „ჯორჯიან მანგანუმი“ სცნო სამართალდამრღვევად და დააკისრა ჯარიმა 15 000 ლარის ოდენობით.

აღნიშნული დადგენილების კანონიერ ძალაში შესვლის შემდეგ, „ლიცენზიებისა და ნებართვების შესახებ“ საქართველოს კანონის 34-ე მუხლის მე-2 პუნქტის შესაბამისად, საქართველოს გარემოსა და ბუნებრივი რესურსების დაცვის სამინისტროს 2014 წლის 17 სექტემბრის No5297 წერილით კომპანიას განმეორებით განესაზღვრა გონივრული ვადები და დაუდგინდა ის ვალდებულებები, რომელთა დაცვაც სავალდებულოა კონკრეტული ქმედების განსახორციელებლად, კერძოდ:

- დაუყოვნებლივ დაეწყო და 6 თვის ვადაში განეხორციელებინა გამამდიდრებელი ფაბრიკების საწარმოო ჩამდინარე წყლების ლოკალური გამწმენდი ნაგებობის სალექარის მოწყობა;

- დაუყოვნებლივ დაეწყო და 6 თვის ვადაში სრულად მოეწესრიგებინა გამამდიდრებელი ფაბრიკის ყველა შლამშემსქელებლის გამართულად მუშაობა გარემოზე ზემოქმედების შეფასების ანგარიშის შესაბამისად;
- 3 თვის ვადაში დაესრულებინა საწარმოს ლაბორატორიის მოწყობის სამუშაოები და უზრუნველყო მისი მუშა მდგომარეობაში მოყვანა;
- აგლომერატის სანაყაროდან მდინარე ყვირილაში დასაწყობებული აგლომერატის მოხვედრის აღკვეთის მიზნით დაუყოვნებლივ დაეწყო და 6 თვის ვადაში დაესრულებინა სანაყაროს პერიმეტრზე წყალამრიდი არხების მოწყობა, ხოლო მდ. ყვირილას მხრიდან დამცავი კედლის აგება;
- დაუყოვნებლივ დაეწყო ფაბრიკის მიმდებარე ტერიტორიაზე ღია ცის ქვეშ მადნის გამდიდრების ტექნოლოგიური ხაზის მოწყობა, გარემოზე ზემოქმედების შეფასების ანგარიშის შესაბამისად.

მოცემული გონივრული ვადები კომპანიის წერილობითი მომართვის საფუძველზე, სამინისტროს 2014 წლის 22 დეკემბრის No7428 წერილით თავდაპირველად გაუგრძელდა 2015 წლის 31 დეკემბრამდე, ხოლო მოგვიანებით ასევე კომპანიის წერილობითი მომართვის საფუძველზე, სამინისტროს 2015 წლის 30 დეკემბრის No9540 წერილით გაუგრძელდა 2016 წლის 01 ივლისამდე.

გამომდინარე იქიდან რომ შპს „ჯორჯიან მანგანეზი“-ს 2016 წლის 01 ივლისის მდგომარეობით შესრულებული არ ჰქონდა ზემოაღნიშნული ვალდებულებები, საქართველოს ადმინისტრაციულ სამართალდარღვევათა კოდექსის 36 მუხლის მე-2 ნაწილის შესაბამისად, 2016 წლის 02 ივლისს შედგა ადმინისტრაციული სამართალდარღვევის შესახებ No030027 ოქმი.

ზემოაღნიშნული ოქმი, 2016 წლის 02 ივლისს განიხილა გარემოსდაცვითი ზედამხედველობის დასავლეთ - ცენტრალური სამმართველოს უფლებამოსილმა პირმა და გამოიტანა დეპარტამენტის ადმინისტრაციული სახდელის დადების შესახებ No000672 დადგენილება, რომლის შესაბამისად შპს „ჯორჯიან მანგანეზი“-ს დაეკისრა ჯარიმა 45 000 ლარის ოდენობით.

„ლიცენზიებისა და ნებართვების შესახებ“ საქართველოს კანონის 34-ე მუხლის მე-4 პუნქტის შესაბამისად „თუ ამ მუხლის პირველი, მე-2 და მე-3 პუნქტებით გათვალისწინებული პასუხისმგებლობის დაკისრების მიუხედავად ნებართვის მფლობელის მიერ არ იქნა უზრუნველყოფილი სანებართვო პირობების შესრულება, ნებართვის გამცემი იღებს გადაწყვეტილებას ნებართვის გაუქმების შესახებ“.

ამასთან, მოცემული მუხლის მე-12 პუნქტის თანახმად „თუ ნებართვის გაუქმებამ უფრო მეტი ზიანი შეიძლება გამოიწვიოს, ვიდრე ნებართვის მოქმედების გაგრძელებამ, ან არსობრივად შეუძლებელია მისი მოქმედების შეჩერება, ნებართვის გამცემი იღებს დასაბუთებულ გადაწყვეტილებას ნებართვის მფლობელისათვის მის მიერ დადგენილი პირობების დაცვით სანებართვო ქმედების განხორციელების უფლების მინიჭების თაობაზე. ასეთ შემთხვევაში ნებართვის მფლობელი ვალდებულია ნებართვის გამცემის მიერ დადგენილ გონივრულ ვადაში უზრუნველყოს დამატებითი სანებართვო პირობების შესრულება“.

ყოველივე ზემოაღნიშნულის გათვალისწინებით, საქართველოს გარემოსა და უნებრივი რესურსების დაცვის მინისტრის 2016 წლის 05 ივლისის Noი-334 ბრძანების შესაბამისად, შპს „ჯორჯიან მანგანეზი“-ს მიენიჭა სანებართვო ქმედების განხორციელების უფლება და ზემოაღნიშნული პირობების შესასრულებლად განესაზღვრა ვადა 2017 წლის 31 დეკემბრამდე.

პატივისცემით,

საზოგადოებასთან ურთიერთობის სამსახურის უფროსი (საჯარო ინფორმაციის გაცემაზე პასუხისმგებელი პირი)



ეკატერინე ბენდელიანი